

Sjeng in de road

't Woar in de sestiger joare dat Sjeng, ene rom en tom bekende Sjlilvender, zich hauw vuurgenomme bij de gemeenteroadsverkezinge oet te komme. Omdat hae ene i Sjlilvend veuël vuurkommende naam hauw, makde hae zoeë wie zoeë een gow kans. En zoeë es wiej Sjeng 't zich gehoapt hauw keem 't ooch oet. Sjeng keem oane veuël remmedemmie in de road. 't Doeërde heuëm te lang vuurdat 't september woar, want da woërt de nuuje road geïnstalleerd. Volgens good gebroek keem me vuur de roadsvergadering bijee in 't café va Wulmke. Neet alleen vuur zich ene te pietsje mer ooch om effe te kenne kalle mit de jonges van de twieë kezette die meistens de roadsversjlage makde. Ooch Sjeng makde van de gelaegenheid gebroek, goof ene oet en vroeg diej twieë kaels, om went hae get in de roadsvergadering zow zegke, in de kezèt ziene naam te neume. De kezètjonges beloafde dat aa Sjeng en dronke laeg op heuëm. De roadsvergadering begos, de nuuje road woërd geïnstalleerd en de burgemeester vong aa mit de agenda. Bij 't zoeëveuelste agendapunt woërd doeër de road om een sjtumming gevraagd omdat men 't zich uuëver de dusj mit kalle neet richtig enig woërd. Wiej Sjeng bij de sjtumming aan de riej woar zag hae kreftig 'taenge'. Wiej de sjtumming woar aafgelope en 't vuursjtjel met 6 taenge 5 sjtumme woar aafgewieëze sjtoeëdde ene fractiegenoot Sjeng aa en zag heuëm dat hae hej motte vuurstumme. Sjeng vroeg zich aan de burgemeester 't woerd en zag dat hae zich verheld hauw en egelik vuur hauw wille sjtumme. De burgemeester zag Sjeng, dat dat noe neet mieë ging en zag taenge Sjeng dat hae een nuuj kier baeter moosj oppasse. 's Angerendaags sjtong Sjeng zoeë wiej hae zelf hauw gewild in de kezet, mer neet zoeë wiej hae 't zich hauw vuurgesjteld. De kezèt euëpende 't versjlaag van de Sjlilvendse roadsvergadering mit groeëte vette lettesj en dao-in sjtong:

“Raadslid was voor maar stemde tegen!”

Me haet Sjeng lang geploagd mit ziee verkieërd sjtumme. Of hae diej kaels van de kezet nog èns get haet gevraagd weet ich neet.

Sjlilvends - Leo Dohmen